

(UPA 2019/15)

Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut tamarmik pilersaarusiunneqartarnissaat qanoq qulakkeerneqarsinnaanersoq kingusinnerpaamik ulloq 1. november 2019-mi qulaajaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatumani nunatsinni kræfteqarlutik toqusartut ikilisinneqarnissaannik anguniagaqarnerup anguneqarnissaa siunertarineqarluni.

(Inatsisartunut ilaasortanit, Stine Egede aamma Sofia Geisler, Inuit Ataqatigiit, saqqummiunneqartoq)

Aamma

(UPA 2019/198)

Nappaassuarmik Kræftimik eqqugaasimalluni paasineqarnermiit sivisunerpaamik ullut 30-vit qaangiutsinnagit katsorsarneqarnerup aallartereersimasarnissaanik qularnaarussisoqartalernissaa qanoq iliorluni piviusunnagortinneqarsinnaanersoq pillugu misissueqqissaarinermik ukioq 2019 naatsinnagu Naalakkersuisut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortamit Jess Svane, Siumut, saqqummiunneqaqqaartoq, taassumali Naalakkersuisunnagornerata kingunerisaanik Siumup Inatsisartunut ilaasortaanit tiguneqartoq)

pillugit

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
 Inatsisartunut ilaasortaq Stine Egede, Inuit Ataqatigiit, siulittaasup tullia
 Inatsisartunut ilaasortaq Karl-Kristian Kruse, Siumut
 Inatsisartunut ilaasortaq Nivi Olsen, Demokraatit
 Inatsisartunut ilaasortaq Malene Vahl Rasmussen, Demokraatit
 Inatsisartunut ilaasortaq Mikivsuk Thomassen, Inuit Ataqatigiit
 Inatsisartunut ilaasortaq Aqqa Samuelson, Inuit Ataqatigiit:

UPA 2019-imi ulloq 11. april 2019-imi siullermeerinnerup kingorna ataatsimiititaliap siunnersuut sukumiisumik misissorpaa.

Siunnersuutip imarisaa siunertaalu

Isumaliutissiisummi uani aalajangiiffigisassatut siunnersuutit kræftimik eqqugaallutik napparsimasut pitsaaneruseqarnera katsorsarneqartalerneqarnera qulakkeerunneqarnissaannik siunnersuutigineqartuni siunertarineqarpoq, taamaaliornikkut peqqissinissamat periarfissat nukittorsaaqataaffigisinnaaqqullugit.

UPA 2019/125-imut:

Kræftimik nappaateqartut tamarmik kræfteqarlutik paasineqarneraniit kingusinnerpaamik ullut 28 qaangiutsinnagit katsorsarneqarnissamat pilersaarusiunneqartarnissaannut qulakkeerinnittoqartalerneqarnera aalajangiiffigisassatut siunnersuut manna aqputigalugu siunnersuuteqartut kissaatigaat.

UPA 2019/198-imut:

Kalaallit Nunaanni kræfteqarlutik napparsimasut kræfteqarlutik paasineqarneriniit sivisunerpaamik ullut 30 qaangiutsinnagit katsorsartinnissamat qulakkeerunneqartarnissaasa qanoq piviusunnigortinneqarsinnaanerani Naalakkarsuisut misissueqqissaarnissaat siunnersuummi matumani siunnersuuteqartut kissaatigaat.

Siunnersuutip Inatsisartunit siullermeerneqarnera

Siunnersuutini siullermeerinnermi akissuteqaat aqputigalugu allannguutissatut siunnersuummik Naalakkarsuisut saqqummiussaaput:

**”Kræftimik nappaateqarnerup paasineqarnerata kingorna ullut 28-t
 qaangiutsinnagit kræfteqartut katsorsarneqarnissamat
 pilersaarusiunneqartarnissaannut aamma kræftimik eqqugaasimalluni
 paasineqarnermiit sivisunerpaamik ullut 30-vit qaangiutsinnagit
 katsorsarneqarnerup aallartereersimasarnissaannik qularnaarisoqartalerneqarnera**

**misissueqqissaarinissamut apeqquitit qulaajarneqarnissaanut, Naalakkersuisut
kingusinnerpaamik UPA2020 peqquneqarnissaannik Inatsisartut
aalajangiiffigisassaattut siunnersuut.”**

Siunnersuutigineqartut sukumiinerusumik naliliivigineqarnissaat siunertaralugu
Ilaqutariinnermut Peqqissutsimullu Ataatsimiititaliami innersuunneqarput.

Ataatsimiititaliap siunnersuutinik suliarinninnera

Innuttaasut kræfteqartut nukittorsarneqarnissaat siunertaralugu Inatsisartuni
naliliivigineqarnissaa pillugu siunnersuuteqartut anguniagaqarneranni ataatsimiititaliamit
siullertut qujaffigineqassapput.

Naalakkersuisut akissuteqaamminni allassimasaat ataatsimiititaliamit maluginiarpa,
taamaattumik kræfteqarlutik napparsimasunut misissuinerit, katsorsaanerit aammalu
malinnaaffigineqarnissaat Naalakkersuisunit immikkut eqqumaffigineqarpoq. Tamanna
minnerunngitsumik nunani avannarlermiunut sanilliullugu kræfteqarnerup kingunerisaanik
Kalaallit Nunaanni toqussutaasarnerata annertunerunera saqqummermat, misissuinerit,
katsorsaanermut aammalu malinnaaffigineqarnerannut atatillugu pitsanngorsaanissamut
inissaqartitsisoqarsinnaammat.

Krafteqartunut tunngatillugu misissuinerit, katsorsaanerit malinnaaffigineqarnerinullu
atatillugu pitsanngorsaataasinnaasut eqqaassanngikkaanni, innuttaasut peqqinnarnerusumik
inuuneqalernissaannut piimassuseqalersinnissaannut suli suliassaqarpugut, tamannami
krætimik eqqugaanissamut pitsaaliuinissamut pingaarnersaammat. Matumani peqqinnartunik
allanngorartunillu nerisaqarneq, timersorneruneq, aanngajaarniutinik atuinikinneruneq
minnerunngitsumillu pujortarunnaarnissaq imaluunniit pujortanngilluinnarnissaq pineqarlutik.

Kræfteqarluni paasineqarnermiit ullut 28-t qaangiutsinnagit katsorsartinnissamut
pilarsaarusiunneqarnissaq pillugu piimasaqaatigineqartup attatiinnarneqarnissaa aamma
kræfteqarluni paasineqarnermiit sivisunerpaamik ullut 30-t qaangiutsinnagit
katsorsarneqarnissap qulakkeerneqarnissaata attatiinnarneqarnissaa soorunami
assigiinngissuseqarput. Naak assigiinngissuseqartoqaraluartoq, siunnersuutigineqartuni
siunertarineqarlutik anguniarneqartunut naapertuuttunik Naalakkersuisut allannguutissatut
siunnersuuteqartut ataatsimut isigalugu ataatsimiititaliaq isumaqarpoq. Kræfteqarlutik
napparsimasut atugaasa attatiinnarneqarnissaat taamaaliornikkut peqqissinissamut
periarfissaasa pitsaanerulernissaat siunnersuutigineqartuni siunertarineqarpoq, tamannalu
namminermi nangaanertaqanngitsumik tapersorneqartariaqarluni.

Kræfti pillugu pilersaarummik pissutsit piviusut aamma periarfissat tunngavigalugit nalilersuinissamat pisariaqartillugulu tulluarsaanissamat allannguutissatut siunnersuut naleqquttuusoq ataatsimiititaliaq isumaqarpoq.

Siunnersuutip aningaasatigut allaffissornikkullu kingunerisassai

Inatsisartut suleriaasianni § 33 naapertorlugu aalajangiiffigisassatut siunnersuutip piviusunnngortinneqarnissaanut aningaasaqarnikkut allaffissornikkullu kingunerisassat allaaserineqarsimassapput. Matumani aalajangiiffigisassatut siunnersuummut, isumaliutissiisummi matumani aalajangiiffigisassatut siunnersuutit Naalakkersuisunit saqqummiunneqartunut allannguutissatut siunnersuutitut aamma tamanna atuuppoq.

UPA 2019/125-mut siunnersuut pillugu:

Kræfteqartut paasineqarnerminniit ullut 28-t qaangiutsinnagit katsorsartinnissamat pilersaarusiunneqarnissaanut kræfteqarlutik napparsimasut tamarmik qulakkeerunneqartarnissaanut misissuinissamat 250. 000 kr.-t missaannik aningaasartuutaanissaa siunnersuutigineqartumi allassimavoq.

Allassimasut ataatsimiititaliamit tusaatissatut tiguneqarput, suliassat nutaat piffissaq eqqarsaatigalugu pingaarnertut suliarineqarnissaat oqartussanit isumagineqartussaammata ataatsimiititaliap pinngitsoorumanngilaa oqaatigissallugu, pineqartumilu suliassat allat Naalakkersuisunit tunulliuunneqarnissaannik kinguneqassalluni.

UPA 2019/198-imut siunnersuut pillugu:

Kalaallit Nunaanni kræfteqarlutik napparsimasut sivisunerpaamik ullut 30-t qaangiutsinnagit katsorsarneqarnissamat qulakkeerunneqarnissaanut qanoq piviusunnngortitsisoqarnissaa pillugu misissueqqissaarnernut 500.000 kr.-inik annertutigisunik aningaasanik atuisoqarnissaannik kinguneqassasoq siunnersuuteqartup siunnersuummi allappaa.

Allassimasut ataatsimiititaliamit tusaatissatut tiguneqarput, erseqqissaatigeqqissalluguli suliassat nutaat Naalakkersuisunit salliutinneqassappata suliassat allat Naalakkersuisunit tunulliuunneqartariaqarneri.

Naalakkersuisut allannguutissatut siunnersuutaat pillugu:

Allannguutissatut siunnersuutip saqqummiunneqartup piviusunnngortinneqarnerani aningaasatigut allaffissornikkulluunniit kingunissai Naalakkersuisunit allaaserineqanngillat. Kræfteqarluni paasineqarnermiit ullut 28-t qaangiutsinnagit katsorsarneqarnissamat pilersaarusiornissaq kiisalu kræfteqarlutik napparsimasut ullut 30-t qaangiutsinnagit

katsorsarneqarnissamut qulakkeerinninnissamut periarfissat pillugit apeqqutiniq ersarissisitsinissamut kingusinnerpaamik UPA 2020-imi imminut pisussaaffilernissaq allaffissornikkut aningaasatigullu annerpaamik 500.000 kr.-inik naleqassasoq ataatsimiititaliamit naatsorsuutigineqarpoq, tamannalu ima isumaqarpoq suliassat allat tunulliuqqartariaqarnerannik.

Ataatsimiititaliap inassuteqaatai

Isumaliutissiisummi oqaatigineqartut innersuussutigalugit Naalakkersuisut allannguutissatut siunnersuutaat akuerineqassasoq siunnersuutaqaqartorlu itigartinneqassasoq ataatsimiititaliamit inassutigineqassaaq.


Taamatut oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappasaaniigassanngortippaa.



Stine Egede
Siulittaasup tullia



Laura Táunâjik
Siulittaasq



Karl-Kristian Olsen




Nivi Olsen



Malene Vahl Rasmussen



Mikivsuk Thomassen



Aqqa Samuelsen